



KNI A/S-imi 2023-mi nalinginnaasumik ataatsimeersuarneq

KNI A/S ukiumi naatsorsuiffimmi kingullermi akileraarutit sulii akilinnginnerini 239 mio. kr.-inik sinneqartoorpoq. Nioqquteqarnermik ingerlatsivik aamma ikummatissaqarnermik ingerlatsivik tamarmik sinneqartoorput Neqi A/S amigartooruteqalaarpoq. Ukiumi angusat assorsuaq naammagisimaarnarput aammali immikkuullareqqinnaarlutik.

Ukioq nalinginnaanngitsaq

Aningaasat naleerukkiartornerat Ukrainimilu sorsunneq nerisassanik ikummatissamillu nioqquteqarnermut nunarsuarmi tamarmi assut ajoqutaasimapput. Nunatsinni tamakku imatut sunniupput nerisassat akii pisisartutsinnut akitsoriartorsimanerini aammali nunarsuarmimi ikummatissat akii allanngoraluaqisut, aatsaallu taama akisutigigiluartut, nunatsinni ikummatissat akii aalaakkaasimapput aatsaallu taamak akikitsigalutik. Nunatsinni ikummatissat akii taamatut immikkuullarinnerat KNI-p nunaqarfinnut illoqarfinnullu tamanut ikummitissamik pilersuinissamini ukiunut arlariinnut atuuttussamik ikummatissamik qularnaarinnittarneranit pivoq. Ikummatissat akii sulii akitsoqqajanngitsullu ikummatissarsinissamut akiliutissap ukiunut arlariinnut atuuttussanngorlugu qularnaarneqarsimaneranit pivoq, tamatumallu nunatsinni ikummatissat akitsornissaraluannut aningaasallu nalikinnerulernissaraluannut pinaveersaartitseqataasimavoq.

Isertitat nioqquteqarnermik aamma ikummatissaqarnermik ingerlatsiviit angusarissaarnerinit pivoq

Ilaatigut Corona pissutigalugu killilersuutit nalinginnaanngitsut atorunnaarsinneqarnerisa kingorna pisiniarfinni quersuarnilu nioqquteqarneq patajaalleqqimmat angusarissaanermut pissutaaqataapput. Isertitat umiarsuarsuit takornariartaatit ikummatissaannik orsersuinnermit kiisalu nunarsuarmimi ikummatissat nalinginnaanngitsumik allanngorinnerinit annerusumik pivoq. Umiarsuarnut takornariartaatinut, kilisaatinut sakkutuullu angallataannut orsiinissamut ikummatissap pisarineqartup orsiunneqarnissaanut tikisinneqartarnera piffissamik eqquilluarluni KNI-p pisarisarsimavaa.

"Ingerlatat nalinginnaasumik amerlinerisa kingunerinik atorfissaqartinneqartut tunniussinnaasimagatsigit assut sunniuteqarluarpoq pingaartumillu takornariat amerlanerunerat assut iluaqutaasimalluni, tassami takornarianiit isertitat ikummatissaasiviit, pisiniarfiit quillu aserfallatsaalineqarnissaannut aningaasaliinissaq taama ililluni aningaasassaqartinneqarluarnerulerpoq.



Niuernermi ingerlatat niuernermi tamarmik pitsaasumik ineriartorsimanerat nuannaarutissaavoq" Inger Eriksen oqaaseqarpoq.

Nutaamik periusissiorqarnikuuvuq

Nunatsinni allanngoriartortoqarnera sukkatsikkaluttuinnarpoq allanngoriartornerillu aatsaat taamak annertutigaat.' Allannngoriartortoqarnera ilutigalugu ajornartorsiutinik aammali periarfissanik pilersoqartarpoq - aamma KNI-mi.

Periarfissanut ajornartorsiutinullu nutaanut sillimmartaarnissatsinnut siunnerfilerneqarnissamut KNI nutaamik periusissiorpoq. Suliffeqarfimmi ukiut ingerlanerini pitsaasorpasut pilersikkiartuaarsimasavut attatiinnassavavut aammali iluaqutaajunnaartut allanngortinnissaannut sapiutissanngilagut.

Tunngaviusumik marlunnik ajornartorsiuteqarpugut:

Nuummi, Ilulissani Qaqortumilu nutaanik mittarfeqalerpat inuit illoqarfinnut anginerusunut nutsernerat sulit sukkarnerusumik nutsertoqarnissamik kinguneqarnissaa naatsorsuutigarpugut - nutsertussallu taakkuussasut nunarfinni illoqarfinnilu mikinerusuni pilersuisuttaatitaaffitsinneertussat. Inuillu nutsernerat ilutigalugu nioqquteqarnermik ingerlatsiviup pisisartui sulit ikiliartuinnarnissaat naatsorsuutigarpugut.

Poortuutissat pillugit nalunaarusiornissamik pilersaaruteqartoqarnerata kinguneraa 2023-p naanerani Nuuk Imeq-p immiaaqqanik sodavandinillu tunisassiorniarunnaarniarluni aalajangernera. Nioqqutinik taakkunannga nunatsinni kisiartaalluta siammarterisuunitsinni nutaamik nioqquteqartoqalernissaanut naleqqussartariaqassaagut, tamannalu ajornartorsiuterpassuarnik aqqiivigineqartussanik nassataqartussaavoq.

"Ajornartorsiutit taakku marluk annertuujupput, taamaattumillu pilersuisussaataatitaanitta kiffartuussisussaataatitaanittalu siunissami aamma ingerlatiinnarsinnaanissaanut nutaaliuutigaluta nutaanillu isertitaqaatissatsinnik pilersitsiniaatigaluta KNI-mi niuernerimik ingerlatsinitsinnik naleqqussaasariaqarpugut.", Jeppe Jensen oqarpoq.

KNI A/S-imi niuernerimik ingerlatani ataasiakkaanut tunngasut

KNI A/S-ip akileraarutit sulit akilinnginnerini 239 mio. kr.-nik sinneqartoorutai nioqquteqarnermik ingerlatsiviup 50 mio. kr.-nik sinneqartoorneranit, siorna 31 mio. kr.-nik sinneqartoorsimasumit, kiisalu ikummatissaqarnermik ingerlatsiviup 188 mio. kr.-nik sinneqartoorsimasumit, siorna 112 mio. kr.-nik sinneqartoorsimasumit, pipput.



Suliffeqarfiutigisanit sinneqartoorutit 1 mio. kr.-iusut ilanngullugit naatsorsorneqarput, taakkunanngalu Neqi A/S 2,5 mio. kr.-inik amigartoorpoq siorna 10,7 mio. kr.-inik amigartoorluni.

Nioqquteqarnermik ingerlatsiviup isaatitaqarnissaa inuit nutsernerisa ingerlaannarnerinik ajornartorsiortinneqassasoq naatsorsuutigineqarpoq aammali immiaaqqanik/sodavandinik nioqquteqarnermik nutaanik atugassaqaalernissamit. Tamanna ilutigalugu nioqquteqarnermik ingerlatsiviup pisiniarfinnut quinullu aningaasaliisarnissaanik pisariaqartitsineq sulii annertusiartorpoq, tamannalu sulii amerlarnerusunik sinneqartoornissamik piumasaqaatitaqarpoq.

Nunarsuarmili akit aalaakkaanerulernerisa kingunerinik ikummatissaqarnermik ingerlatsivimmi isertitat ikiliartulernissaat naatsorsuutigineqarpoq. Nunatsinni tamarmi ikummatissaasivinnik nutarterineq sulii ingerlanneqarpoq soorluttaaq mittarfittaartoqarnissaanut nutaanik ikummatissaasiviliornermut aningaasaliisoqarsimasoq. Taamaattumik ikummatissaqarnermik ingerlatsivimmi isertitat sulii amerlasuujunissaat pisariaqarpoq.

Neqi A/S-ip ukiumi angusaasa -2,5 mio. kr.-iusut takutippaaat suliffeqarfiup siunissami ungasinnerusumi atugassaqartinnissaanut aaqqiisoqarnissaanik pisariaqartitsisoqartoq. Suliffeqarfiutigisap piginnittumut nammineq aningaasaatai pilerseqqinneqarput suliffeqarfiup akiitsui KNI-mit isumakkeerneqarmata, tamannalu suliffeqarfimmut patajaallisaataagallarpoq.

Ajornartorsiutit matuma siuliani taaneqartut suliffeqarfiup nutaamik periusissiorneratigut anigorniarneqassapput, taamaattoqarnissaanili Namminersorlutik Oqartussanut kiffartuussinissamik isumaqatigiissutit nutaamik patajaallisaavigineqarnissaat pisariaqarpoq. Tamakku pillugit oqaloqatigiinnerit ingerlanneqalereernikuupput kiisalu suliffeqarfimmut atugassarititaasut ungasinnerusumut aaqqiissutaasinnaasut suliniutigineqarnerat sulii ingerlanneqarpoq.